

PM zahir rasa sedih pemergian Razali

Kuala Lumpur: Perdana Menteri, Datuk Seri Anwar Ibrahim menzahirkan rasa sedih atas pemergian pengasas dan Presiden Angkatan Belia Islam Malaysia (ABIM) yang pertama, Dr Razali Nawawi.

Dalam hantaran di Facebook, Anwar berkata, Razali yang meninggal dunia di Hospital Pakar An-Nur jam 6.45 pagi semalam, seorang penjana dan pendiri ABIM yang gigih bersama beliau dan rakan, selain antara guru dalam perjuangan penuh liku.

“Saya sempat menziarahi beliau minggu lepas yang sedang uzur.

“Mendoakan keluarga yang ditinggalkan tabah dan dikurniakan kekuatan oleh Allah SWT. Innalillahi wainnailahirajiun,”

katanya yang meluangkan masa pada 13 Mei lalu, menziarahi Razali di kediamannya.

Presiden ABIM, Muhammad Faisal Abdul Aziz ketika dihubungi BERNAMA, berkata Razali, 83, menjadi Presiden ABIM pertama pada 1972 memperkenalkan sistem usrah dan diambil alih Anwar pada 1974, meninggal dunia akibat kanser prostat.

Sementara itu, Timbalan Perdana Menteri, Datuk Seri Dr Ahmad Zahid Hamidi, berkata Nawawi antara pencetus idea penyatuan ummah menerusi pembentukan Kerajaan Perpaduan yang ada sekarang.



Razali Nawawi